

ANALISIS FAHAMAN EKSTREMIS AGAMA DAN MEDIA SOSIAL DI MALAYSIA

***(ANALYSIS OF EXTREME RELIGION FOLLOWERS AND SOCIAL
MEDIA IN MALAYSIA)***

**Muhd Imran Abd Razak, Rahimin Affandi Abdul Rahim,
Mohd Anuar Ramli, Siti Maimunah Hj. Kahal &
Rabiatul Adawiyyah Mohamed Ratha**

Abstrak

Secara asasnya penyebaran agama Islam di Nusantara sejak zaman awal telah berlaku dalam keadaan damai dan proses interaksi dengan golongan bukan Islam juga berlaku tanpa unsur keganasan dan ekstremisme. Namun begitu, kemunculan gerakan terrorisme global seperti al-Qaeda, Jemaah Islamiyyah dan terkini kumpulan Daesh akhirnya berjaya menyelinap masuk elemen ekstrem dan radikal ke dalam kehidupan beragama masyarakat Islam rantau ini termasuk di Malaysia. Berdasarkan hakikat tersebut, kajian ini menganalisis secara kritikal fahaman serta proses penyebaran ideologi kumpulan ekstremisme radikal khususnya Daesh di Malaysia dengan menumpukan terhadap aspek media sosial. Hasil kajian mendapati kumpulan Daesh menganut fahaman ekstremisme agama yang berbahaya serta telah menggunakan kemudahan media sosial sebagai medium penyebaran dakwah yang berkesan. Oleh itu, usaha melakukan *counter-terrorism* perlu memahami fahaman kumpulan Daesh serta strategi berkesan mengatasi peperangan ideologi mereka di media sosial.

Kata Kunci: Ekstremisme agama, terrorisme, Daesh, media sosial, anti keganasan.

Abstract

Basically, the spread of Islam in the archipelago since ancient times has taken place in a state of peace and the process of interaction with non-Muslims also occurs without the element of terrorism and extremism. However, the emergence of global terrorism movements such as al-Qaeda, Jemaah Islamiyyah and the latest group of Daesh have finally managed to sneak into extremist and radical elements into the Muslim religious life of the region, including in Malaysia. Based on that fact, this study critically analyzes the ideology and dissemination process of the radical extremist group especially Daesh in Malaysia by focusing on aspects of social media. The findings show that the Daesh group embraced the harmful religious extremism and used social media facilities as an effective propagation medium. Therefore, efforts to counter-terrorism need to understand Daesh group's understanding and effective strategies to overcome their ideological wars in social media.

Keywords: Religious extremism, terrorism, Daesh, social media, anti-terrorism.

PENGENALAN

Perkembangan kumpulan ekstremisme agama didorong oleh pelbagai faktor sama ada faktor dalaman ataupun luaran. Salah satu faktor penting adalah melalui medium internet khusus media sosial. Penyebaran ideologi ekstrem yang berlawanan dengan fitrah manusiawi serta norma budaya tempatan dilihat tersebar dengan begitu meluas dan sukar untuk dikawal. Majalah-majalah atas talian kumpulan Daesh seperti Rumiayah dan Dabiq, ribuan akaun Twitter dan Facebook, video-video propaganda terbitan al-Hayat Media Center dan lain-lain telah memberikan impak dan implikasi keselamatan yang serius kepada rantau Asia Tenggara yang dianggap rantau yang begitu strategik bagi perkembangan kumpulan Daesh tersebut. Jika tidak ditangani dengan betul dan berkesan, keharmonian beragama masyarakat di rantau ini khususnya di negara Malaysia akan terjejas dan membawa kemudaratan yang lebih besar di masa akan datang.

EKSTREMISME AGAMA DI ALAM MELAYU: SOROTAN SEJARAH

Sejarah Islam di Alam Melayu klasik mencatatkan selain daripada peristiwa hitam di Aceh (isu pertentangan Nurudin Raniri dan Hamzah Fansuri), memang tidak ada gerakan ekstremisme yang timbul. Hal ini cuba dinafikan oleh sarjana kolonial. Dalam soal ini, mereka mempergunakan ilmu kolonial, seperti mana dijelaskan oleh Knaap (1994: 637-652);

"In order to rule the colonies properly, the colonial power of the time were of the opinion that they needed not only a strong army and navy and a well-trained civil service, but also scholarly and practical knowledge of the indigenous society. Scholarly interest in the colonies can thus be interpreted as an offspring of the process of kolonial state formation. During the nineteenth and early twentieth centuries, in England and France as well as in the Netherlands, all sorts of journals came into being to disseminate knowledge about the colonies. Few of these journals survived the wave of decolonization after the Second World War. In the Netherlands only two survived, Bijdragen and (Nieuwe) West-Indische Gids, founded in 1919. The other well-known journal on Southeast Asia from this period that is still in existence is the Journal of the Malaysian Branch of the Royal Asiatic Society, founded in 1878."

Mereka menyebarkan dalam kalangan masyarakat antarabangsa melalui jurnal ilmiah (seperti JRAS) bahawa penganut Islam alam Melayu terlibat dalam aktiviti keganasan yang memerangi pihak kolonial. Raffles contohnya, menegaskan bahawa proses Islamisasi Alam Melayu yang diusahakan oleh mubaligh awal penuh dengan paksaan dan tipu muslihat, serta mengajar masyarakat Alam Melayu untuk bersikap ganas pada golongan bangsa Eropah sebagai akibat daripada semangat Perang Salib yang berlaku di Timur Tengah (Syed Muhd Khairudin 2003: 13-29). Ia dijana dan dilakukan oleh ulama melalui institusi haji (Bruinessen 1992: 3-14). Hal ini terbukti dalam beberapa siri penentangan terhadap pihak kolonial seperti Perang Padri, Perang Pattani, Perang Dato Bahaman di Pahang dan banyak lagi (Hasanudin 2009).

Pihak kolonial menjadikan kerajaan Aceh sebagai sasaran utama. Pemerintah Aceh dalam paparan sarjana Barat digambarkan sebagai kerajaan yang ganas dan suka menumpahkan darah orang Barat yang berbeza agama (Hurgronje 1985). Dicitatkan oleh sejarawan Portugis bagaimana pemerintah Aceh enggan berhubung dengan baik apabila berhadapan dengan rombongan pedagang Portugis. Catatan sejarah Portugis menerangkan bahawa pihak Portugis beberapa kali cuba untuk mengelakkan peperangan secara baik, kerana matlamat mereka adalah untuk menjalankan perdagangan dengan kerajaan lain di Alam Melayu. Mereka juga menggambarkan secara berlebihan berkenaan kehebatan tentera Portugis berbanding dengan tentera Aceh. Kerajaan Aceh dikatakan berusaha memonopoli sumber rempah di Alam Melayu dengan menyerang dan memusnahkan ladang lada hitam di kawasan lain. Aceh juga dikatakan suka menyerang kawasan lain untuk memperluaskan kuasa dan diikuti dengan dasar membawa balik tawanan perang ke Aceh untuk dijadikan hamba dan gundik (Clarence Smith 2007: 8-15). Hamba-hamba ini dikatakan dizalimi oleh masyarakat Aceh. Masyarakat Aceh dikatakan mempunyai ramai hamba dan gundik untuk

kepentingan pembesar Aceh (Mitrasing 2011). Sarjana Barat juga melalui catatan pengembara asing telah menggambarkan Aceh mengamalkan sistem undang-undang hudud yang sangat zalim dan tidak berperikemanusiaan (Burhanudin 2014: 25-28).

Namun begitu, sarjana tempatan kemudiannya menangkis dakwaan ini tidak benar kerana semua penentangan ini bukanlah keganasan tetapi dibuat demi untuk menjaga maruah umat Islam melalui konsep jihad di samping Aceh merupakan sebuah kerajaan yang berdaulat.

ANCAMAN EKSTREMISME AGAMA ZAMAN MODEN

Dalam era tahun 1990-2000-an, realiti ini telah berubah apabila penganut Islam melalui al-Qaeda dan Jemaah Islamiyyah telah melakukan pelbagai aksi keganasan yang mengorbankan nyawa orang awam. Sepanjang tahun 2001 -2005, pelbagai aksi keganasan dilakukan bermula dengan Peristiwa 11 September 2001, pengeboman Bali dan banyak lagi. Mengikut Azyumardi Azra, Bom Bali dapat dikatakan sebagai: *a new phase of violence and terror in the country*. Ia kemudiannya mencetuskan lagi beberapa siri pengeboman di banyak tempat di Indonesia (Azyumardi Azra 2003). Sepanjang tahun 2000-2005 memang berlaku banyak pengeboman lain seperti Bom Hotel J.W. Marriot tahun 2003, Bom Kedutaan Besar Australia tahun 2004 serta Bom Bali II tahun 2005.

Secara umumnya, masyarakat Asia Tenggara seolah-olah menyangka bahawa selepas tragedi pengeboman Bali 2002, pengaruh Jemaah Islamiyyah-al-Qaeda telah pun mati. Ini berlaku kerana kebanyakan tokoh-tokoh penting dalam Jemaah Islamiyyah sama ada telah mati, ditangkap atau mendiamkan diri. Namun begitu, ternyata ancaman keganasan tersebut masih belum terhapus sepenuhnya, sebaliknya muncul semula dalam bentuk yang baru. Hal ini sebagaimana yang dinyatakan oleh Bilveer Singh (2017: 5-7);

By 2011, however, JI appeared to have been severely degraded with its key military and ideological leaders either dead or detained; some broke away to form splinter groups. Among those killed or executed included operatives such as Azzahari Husin (2005), Imam Samudra (2008), Nordin M Top (2009), and Dulmatin (2010). Leaders under detention include Abu Bakar Bashyir, Hambali, and Abu Dujana. The organisation's structure and networks were also believed to have been severely disrupted. Globally, Abu Bakr al-Baghdadi's IS has superseded AQ as the leading global jihadi movement and key security threat. The killing of Osama bin Laden in 2011, and expansion of IS in Iraq and Syria culminating in the declaration of a caliphate in June 2014, have eroded AQ's position as the base of jihad. In Southeast Asia, especially in Indonesia, Malaysia, and Singapore, counter-terrorism measures are believed to have crippled JI and rendered it ineffective. In Indonesia alone, more than 110 JI members have been killed and 1,200 imprisoned.

Maknanya, masyarakat Asia Tenggara seolah-olah menyangka pengaruh Jemaah Islamiyyah telah pun mati sepenuhnya. Dalam soal ini, Bilveer Singh memberi amaran bahawa dakwaan ini kurang tepat. Ini kerana hasil temu bual dengan Abu Rushdan yang terkini yang mendedahkan bahawa Jemaah Islamiyyah telah beroleh keuntungan dengan perkembangan pesat ISIL. Ia menjelaskan beberapa perubahan taktik gerakan dan keuntungan yang diperoleh Jemaah Islamiyyah.

Pada era selepas tahun 2011, dunia digemparkan pula dengan gerakan radikalisme yang dilakukan oleh Daesh. Berbanding dengan Jemaah Islamiyyah, Daesh lebih menonjol dalam beberapa perkara, iaitu;

1. Kemampuan memanfaatkan kemajuan internet seperti majalah atas talian, YouTube dan media sosial untuk mempengaruhi ahli baru.
2. Sifat kekejaman yang dilakukan. Ia telah dirakam dan disebarkan ke seluruh dunia. Ia bagi menunjukkan kekuatan mereka tetapi impaknya telah merosak imej Islam di mata dunia (Muhd Imran et al. 2016: 62-63).

BUTIRAN IDEOLOGI EKSTREMISME AGAMA

Ekstremisme agama diwakili oleh golongan yang melakukan ekstremisme (terorisme) menggunakan nama Islam, walaupun pada dasarnya tindakan ini bertentangan sama sekali dengan Islam. Golongan ini terdiri daripada kumpulan Khawarij dan Salafi Jihad. Mengikut pakar Barat, gerakan Salafi pada hakikat terbahagi kepada tiga jenis: Salafi dakwah, politik dan Salafi jihad. Dua aliran Salafi yang awal (dakwah dan politik) mengajak masyarakat berpegang kepada apa yang diamalkan oleh generasi salaf tanpa melakukan tindakan ekstremisme. Manakala Salafi Jihad pula menggunakan pendekatan revolusi untuk mencapai maksud mereka. Atas dasar itu, Salafi Jihad dianggap sebagai fahaman neo-Khawarij bentuk baru yang timbul selepas kematian Syed Qutb (Wiktorowicz 2005: 75-97). Mereka memperjuangkan penubuhan negara Islam yang menguatkuasakan undang-undang Islam melalui jalan revolusi. Mereka tidak bertolak ansur dengan sebarang elemen menyimpang seperti *bidaah* yang berlaku dalam masyarakat dan akan berusaha menghapuskannya melalui jalan kekerasan (Mohamed Ali 2012).

Pada peringkat awalnya, golongan Salafi Jihad berpusat di Afghanistan, Iraq, Syria dan Asia Tenggara. Ia bergerak secara sembunyi di beberapa negara blok Barat seperti Eropah, Amerika dan Australia. Secara genealoginya, gerakan Salafi Jihad ini mendapat idea asas daripada penulisan Syed Qutb tentang konsep *Jabiliyah Moden* dan *Hukumiah* (Bubalo & Fealy 2005), manakala bentuk keahlian dan organisasinya yang tersusun wujud selepas berlakunya penaklukan Afghanistan oleh kuasa Rusia. Ramai pejuang Islam daripada seluruh dunia telah pergi turut sama berperang melawan kuasa Rusia. Semasa di Afghanistan dan Pakistan mereka telah menerima fahaman radikal dan latihan ketenteraan di kem *Herat*, *Sa'ada* dan *Torkham* (Mohd Mizan Mohammad 2009). Kem-kem latihan ini mendapat pembiayaan daripada Arab Saudi dan CIA (Carr 2002). Terdapat beberapa tokoh utama yang terlibat dalam proses indoktrinasi ini terdiri dari Usamah Bin Laden, Ayman Zawhiri, Abu Mus'ab Zarqawi dan Abdullah Azam sebagai ideologi utama yang mengasaskan ideologi Salafi Jihad ini (Benson 2015).

Selepas perang Afghanistan tamat, pejuang-pejuang ini telah pulang ke tempat asal masing-masing dengan membawa fahaman Salafi Jihad. Hasil, mereka mengasaskan pelbagai rangkaian gerakan Salafi Jihad yang berbeza mengikut kawasan;

1. Al-Qaeda sebagai pusat asas gerakan di Afghanistan.
2. Bay'at Imam di Jordan di bawah Abu Musab Zarqawi yang kemudiannya berkembang menjadi Daesh.
3. Individu di Barat yang bertindak sebagai *Lone Wolf* yang mana walaupun tidak bernaung di bawah Al-Qaeda, tetapi bersimpati dan menerima fahaman Salafi Jihad ini. Mereka terlibat melakukan aktiviti keganasan terhadap kepentingan dan kawasan awam di Barat (Dickson 2015).
4. Abu Sayyaf di selatan Filipina.
5. Jemaah Islamiyyah (Zulkifli Mohd Yusoff 2005: 39-62) dan pecahannya KMM di Asia Tenggara. Antara nama-nama yang terkenal Abu Bakar Bashir, Abdullah Sungkar, Hambali, Dr. Azhari, Nordin Mat Top, Imam Samudera, Zainon Ismail, Nik Adli Nik Mat dan banyak lagi (Kamarulnizam Abdullah 2009: 79-106).

Di Malaysia, bekas pejuang daripada Afghanistan dan Pakistan ini telah menubuhkan persatuan MASSA-Pakindo (*Persatuan Bekas Pelajar Pakistan, India dan Indonesia*). Tujuan MASSA-Pakindo adalah untuk memantau, menyelaras dan meneruskan penyebaran dan aktiviti keganasan di Malaysia. Mereka juga turut berusaha menghidupkan jalinan dengan bekas pejuang Salafi Jihad lain yang ada di seluruh dunia (Mohd Mizan 2009). Jalinan ini lebih khusus lagi membabitkan rakan-rakan seperjuangan yang ada di Asia Tenggara seperti Indonesia, Selatan Thailand, Singapura, Filipina dan Australia (Sugunnasil 2006: 119-144).

Aliran ekstremisme ini dapat ditelusuri berasal daripada ideologi golongan Khawarij sebagai ekstremis agama terawal yang mempunyai beberapa ideologi utama, seperti (Green 2009);

1. Pemahaman agama Islam yang terdapat dalam Quran dan al-Sunnah perlu dibuat secara literal semata-mata, serta ianya harus diamalkan sepenuhnya.
2. Pandangan mereka sahaja yang paling betul dan sesiapa yang bertentangan pendapat dengan mereka akan diisytiharkan sebagai kafir dan halal darahnya. Bahkan lebih teruk lagi, semua anggota keluarga golongan yang berbeza pendapat dengan mereka halal darah mereka, termasuklah kaum perempuan dan kanak-kanak.
3. Kawasan yang menjadi tempat tinggal mereka akan dianggap sebagai *Dar al-Islam*, sedangkan daerah Islam yang lain adalah *Dar al-Kufr* yang wajib diperangi. Seluruh penduduk daerah Dar al-Kufr ini adalah bertaraf musyrik, tidak kira sama ada dewasa ataupun kanak-kanak.
4. Sesiapa yang melakukan dosa besar ataupun kecil secara berterusan akan menjadi kafir secara mutlak dan seandainya mati ianya akan kekal di dalam neraka.

Menurut Iviarquardt & Heffelfinger (t.t.), asas yang diletakkan oleh Khawarij ini kemudiannya telah dikembangkan oleh aliran Salafi Jihad menjadi:

1. Perjuangan didorong oleh semangat perang Salib melawan kuasa Barat perlu diteruskan. Musuhnya terdiri daripada semua blok kuasa Barat dan Zionisme yang wajib diperangi menggunakan kaedah kekerasan. Terbaru, musuh utama turut di panjangkan kepada mazhab Syiah – Kes *Kumpulan al-Qaeda* di bawah pimpinan Abu Mus'ab al-Zarkawi dan ISIS di Iraq.
2. Penubuhan sistem khalifah Islam hanya dilakukan melalui jalan revolusi. Ia bukan sekadar suatu alternatif, tetapi suatu kewajiban Syarie berdasarkan perintah dan kehendak Allah. Kerana itu setiap penganut Islam harus patuh dengan mematuhi kehendak Allah ini. Sebarang keingkaran dianggap sebagai memusuhi perintah Allah. Dalam banyak hal, mereka tidak mempedulikan soal masalah atau ketentuan syarak dalam membuat keputusan. – Kes pemerintahan *Taliban* dan ISIS.
3. Memandangkan legitimasi pemerintah Islam didasarkan kepada syariah Allah, maka pemerintah yang tidak mematuhi syariah adalah tidak sah. Mana-mana pemerintah dan individu Islam yang tidak mematuhi syariah Allah akan dianggap bersalah dan kafir yang diperangi menggunakan konsep Jihad – Kes pembunuhan Anwar Sadat oleh pengikut kumpulan *Takfir wa al-Hijrah*
4. Program penentangan terhadap pemerintah Islam yang ingkar perlu diperluaskan dengan memerangi ulama rasmi berserta dengan semua prasarananya (seperti masjid dan sekolah) yang dilihat bergabung dengan pihak pemerintah- Kes *Jemaah Islamiyyah*.
5. Jihad melawan kekafiran dan golongan yang bersimpati dengannya adalah dianggap sebagai tugas suci. Oleh sebab itu memerangi golongan ini diwajibkan ke atas semua mukmin sejati, yang perlu juga diperluaskan kepada semua golongan awam dan kepentingan mereka. Ia menuntut komitmen kesetiaan dan ketaatan yang total. Bagi mereka, seseorang itu dilihat daripada segi status keagamaannya, hanya berada dalam dua keadaan semata-mata; sama ada Islam ataupun kafir.
6. Fahaman takfirisme; tindakan mengkafirkan golongan yang tidak sependapat dengan pemikiran mereka. Implikasinya darah orang yang dikafirkan, termasuk ahli masyarakat awam yang tidak sependapat dengan mereka dianggap sebagai halal (Mohamed Ali 2012: 188-219). Jadi, bagi mereka diharuskan untuk membunuh lawan dan orang awam yang bersekongkol dengan lawan mereka. Bahkan mereka lebih selesa membunuh sesama Islam daripada membunuh orang bukan Islam sendiri (Zulkarnain Haron 2013: 15-37).
7. Golongan Kristian dan Yahudi dianggap sebagai kafir, dan bukannya sebagai Ahli Kitab kerana hubungan mereka dengan kuasa kolonialisme Barat dan Zionisme. Mereka dipandang sebagai rakan rapat dalam sebuah konspirasi Yahudi-Kristian melawan Islam dan dunia Islam.
8. Mereka mewujudkan fahaman berbentuk binari (wujud musuh yang saling bertentangan; *Dar al-Harb* dan *Dar al-Islam*). Dar al-Harb adalah musuh mutlak Islam. Mereka memusuhi semua perkara baru yang datang daripada Barat. Barat dianggap sebagai Dar al-Harbi yang wajib diperangi dan dilakukan keganasan yang mengorbankan nyawa penduduk dan aset masyarakat. Mereka sangat menggalakkan pengikut mereka memusuhi dan memerangi semua elemen yang berkaitan dengan Barat (Kippe 2010).

9. Generasi muda Islam digalakkan untuk terlibat di dalam memerangi golongan kafir sebagai anti tesis kepada golongan Islam, yang dikatakan bakal memperoleh status mati syahid seandainya sanggup mengorbankan dirinya dalam pengeboman berani mati.

Pengenalan Kumpulan Daesh

Daesh atau ISIL adalah hasil projek ketenteraan *Shock and Awe* ciptaan Amerika pada tahun 2003 dalam usaha Amerika hendak menjatuhkan kerajaan Iraq di bawah Saddam Hussein. Amerika memberi latihan kepada pejuang Arab, sebahagiannya ahli al-Qaeda yang diberikan kemudahan senjata dan kewangan. Apabila Amerika keluar daripada Iraq, saki baki pejuang ini dalam jumlah 800 orang berjaya menawan Mosul dan Kirkuk yang mempunyai tentera kerajaan berjumlah 30,000 orang. Saki baki kelengkapan senjata yang ditinggalkan oleh tentera Iraq telah dipergunakan untuk memperluaskan jajahan tentera Daesh di beberapa tempat di Iraq dan Syria (Ahmad Sauffiyan Abu Hassan 2016: 381-404).

Kaedah Pengrekrutan Ahli Daesh

Maklumat yang diperoleh daripada program *counter terorisme* di Singapura mendapati proses penrekrutan ahli dibuat melalui beberapa cara utama. Antaranya:

1. Proses Mencari Ahli Baru

Mengikut Kumar Ramakrishna (2009: 31-36), seseorang ekstremis itu biasanya manusia yang bermasalah daripada segi kekosongan spiritual dan pegangan agama. Ini kerana;

1. Mereka dahagakan sentuhan spiritual.
2. Terlalu percayakan seorang tokoh ekstremis yang dijadikan rujukannya.
3. Komited dengan agama tetapi amat sedikit pengetahuan agamanya. Mereka akan didedahkan dengan realiti umat Islam ditindas dan dizalimi oleh kuasa besar.
4. Terdesak daripada segi kewangan.

Golongan yang mempunyai keempat ciri ini yang selalu dicari oleh tokoh ekstremis. Kumpulan ekstrem akan mendekati golongan ini dengan memberi semua keperluannya. Mereka dibawa serta program usrah secara rahsia. Apabila mangsa ini mula memprotes dan enggan memberikan kerjasama, mereka akan diberi ugutan bahawa pihak polis telah mengetahui dan mengintip gerak geri mereka. Hal ini menyebabkan mangsa terbabit menjadi takut dan semakin merapatkan diri dengan ahli ekstremis.

2. Peranan Pola Fikir (*Mindset*) Islam Yang Radikal

Pakar Daesh menekankan peranan ideologi yang ditanam kepada ahli baru. Mereka diterapkan dengan elemen kebencian pada Barat. Memang maklumat yang diasak masuk ke dalam pemikiran ahli ini betul, tetapi ianya diterapkan bercampur dengan asas kebencian kepada Barat (Mirra Noor Milla 2013: 92-100).

Ideologi ini menjadi pemangkin sebarang bentuk pemikiran, sikap dan tindakan manusia. Ia juga menjadi mekanisme pertahanan yang bakal menolak semua idea baru yang masuk. Maklumat ini pula dianggap sesuai dengan nilai Islam yang bersifat mutlak dan tidak boleh dilawan kerana akan menyebabkan seseorang menjadi kafir.

Menurut Muhammad Haniff (2009: 76-83), dalam proses ini, ahli Daesh diasak dengan beberapa maklumat seperti:

1. Konsep tauhid dalam tiga bentuk (Ululhiyah, Rububiyyah dan Sifatiyyah). Apa-apa yang berlawanan dengan tauhid ini wajib diperangi. Mati kerana mempertahankan asas tauhid dianggap sebagai syahid.
2. Memang ada perbezaan antara Islam dan kafir. Orang kafir dianggap degil kerana tidak mahu menerima Islam walaupun hakikatnya mereka tahu kewujudan Allah. Orang kafir bertindak seperti syaitan, walaupun mengetahui kebenaran Islam tetapi tetap enggan menerima, bahkan sebaliknya memusuhi dan membunuh umat Islam.
3. Fahaman Takfirisme, iaitu fahaman mengkafirkan golongan yang tidak sehaluan dengan pemikiran mereka. Kesannya darah orang yang dikafirkan, termasuk golongan awam yang tidak sependapat dengan mereka dianggap sebagai halal. Jadi, bagi mereka diharuskan untuk membunuh lawan dan orang awam yang bersubhat dengan musuh mereka. Bahkan Daesh membunuh sesama Islam berbanding membunuh orang bukan Islam (Zulkarnain Haron 2013: 15-37).
4. Ahli akan didedahkan dengan peristiwa, bahan bacaan, filem, gambar yang menunjukkan kezaliman orang kafir pada Islam. Dalam hal ini, kes penderitaan umat Islam di Afghanistan, Palestin, Iraq, Kashmir akan diberikan.

3. Konsep Jihad dan Kuasa Khalifah Islam

Sebagai cara untuk menyelesaikan masalah kezaliman yang dihadapi oleh umat Islam kita wajib untuk memperjuangkan konsep jihad dan sistem khalifah Islam. Hal ini dapat diperincikan oleh Zulkarnain Haron (2013: 15-37);

1. Sebagai umat bermaruah, wajib membalas kezaliman orang kafir agar mereka sedar Islam mempunyai maruah. Untuk itu, hanya konsep jihad dalam bentuk *al-Qital* (perang) yang mampu membawa Islam pada kejayaan. Jihad-jihad lain seperti membangunkan ilmu dan ekonomi mustahil akan berjaya kerana sistem penentu kehidupan dunia ditentukan oleh orang kafir. Wujudnya permusuhan abadi orang bukan Islam pada Islam seperti ayat Quran yang menyebut orang Yahudi dan Nasrani sampai kiamat tidak akan reda dengan Islam.
2. Konsep Jihad bersenjata adalah satu-satunya jalan untuk mewujudkan negara Islam. Ia adalah Fardu Ain.
3. Perang terhadap orang kafir termasuk mencederakan orang awam dibenarkan kerana:
 - a. Kuasa kafir pun melakukan hal sama pada orang awam Islam. Jadi dibolehkan membuat benda yang sama demi membalas dendam bagi pihak orang awam Islam.
 - b. Orang awam kafir memang mengundi untuk memilih ketua mereka dan mereka membayar cukai untuk menyokong kerajaan mereka.
 - c. Dibolehkan membunuh orang awam kafir demi untuk capai matlamat Jihad yang lebih tinggi (meninggikan kalimah Allah).
 - d. Operasi bom bunuh diri dibenarkan yang dianggap operasi syahid.
4. Golongan ekstremis menolak secara mutlak semua dasar dan falsafah Barat (Kruglanski 2004). Sebabnya, sebelum ini, sistem Barat yang menjadi kuasa hegemoni yang mempengaruhi rakyat awam. Rakyat akan bersetuju dengan sistem tajaan Barat kerana ia didukung dengan;
 - a. Sistem Barat itu dianggap betul kerana ada kuasa undang-undang dan ianya dibuat melalui mekanisme pilihanraya yang dipandang tinggi oleh rakyat.
 - b. Ia dipersetujui ramai kerana mendapat sokongan autoriti seperti perlembagaan negara, raja dan ulama. Jadi, bagi golongan ekstrem, semua elemen hegemoni ini wajib ditolak.
5. Mereka mewujudkan fahaman berbentuk binari (wujud musuh yang saling bertentangan; *Dar Harb* dan *Dar Islam*). Dar Harb adalah musuh mutlak Islam. Mereka memusuhi semua perkara baru yang datang daripada Barat. Barat dianggap sebagai *Dar al-Harbi* yang wajib diperangi dan dilakukan keganasan yang mengorbankan nyawa penduduk dan aset masyarakat. Mereka sangat menggalakkan pengikut mereka memusuhi dan memerangi semua elemen yang berkaitan dengan Barat (Kippe 2010).
6. Konsep *al-Wala'* dan *al-Bara'*. Orang Islam tidak boleh bersekutu dengan bukan Islam dalam segenap perkara. Tinggal di negara bukan Islam juga tidak digalakkan. Kita dibenarkan melawat negara kafir hanya dengan syarat mahu berdakwah sahaja. Namun begitu, kita dibolehkan belajar sains dan teknologi orang Barat dengan syarat dan niat ia akan

dipergunakan untuk mengalahkan mereka. Orang kafir wajib membayar jizyah kepada orang Islam. Tidak dibolehkan sama sekali menjalinkan hubungan diplomatik dengan kerajaan kafir (Muhd Imran et al. 2016: 57-80).

7. Keperluan pada kuasa untuk menjalankan undang-undang Islam. Wajib bagi semua orang Islam menyokong golongan Salafi Jihad mendapatkan kuasa.
8. Semua sistem selain Islam seperti kemasyarakatan, ilmu, politik dan pemerintahan dalam dunia diasaskan oleh orang kafir. Ia diasaskan oleh Zionis - Kristian yang memang memusuhi Islam. Sistem Barat ini dibantu autoritinya melalui peranan ulama sesat yang mengetahui kebenaran tetapi enggan menerimanya kerana pentingkan kebendaan.
9. Perubahan dalam masyarakat hanya perlu menggunakan pendekatan revolusi dan bukannya evolusi. Pendekatan evolusi tidak akan berjaya dan hanya akan memantapkan lagi sistem sekular.
10. Faktor emosi dan konsep ummah sejati yang mengeratkan hubungan sesama ahli ditekankan. Atas dasar itu, ukhuwah diikat atas dasar tauhid dan jihad melawan musuh yang sama akan diberikan.
11. Kaedah penilaian baik dan buruk yang dipegang adalah berdasarkan akidah dan prinsip asas Salafi Jihad. Setiap nilai baik dan buruk yang dipegang mesti mengikut formula salaf.
12. Asas penting untuk mendukung perubahan yang berlaku hanya dapat dilakukan dengan mewujudkan sistem khalifah Islam, di samping wajib menghancurkan sistem dan struktural musuh yang berupa kerajaan umat Islam dan kerajaan Barat.

DAESH DAN PENGGUNAAN MEDIA SOSIAL

Dalam era digital, internet telah dimanfaatkan oleh golongan ekstremis untuk merekrut ahli, pendidikan, berkomunikasi dan pengumpulan dana (Gordon et al. 2015: 244). Penyelidik keganasan berpendapat bahawa pengaruh Daesh seperti api dalam sekam yang berkembang pesat tanpa disedari dan ianya mendapat sokongan golongan muda di Malaysia. Media utama penyebaran fahaman ini dibuat melalui internet yang dilakukan dengan cukup berkesan sekali (Ferguson 2016). Ini kerana golongan muda ini lebih terdedah dalam penggunaan internet yang sifatnya lebih terbuka, interaktif dan global (Chan 2015: 4-8).

Keberkesanan medium internet dalam penyebaran ideologi keganasan dapat difahami dengan melihat kepada paparan ini. Bahkan, fungsi internet ini sangat cekap dalam menyebarkan maklumat (Abu Hassan Hasbullah 2008: 47-70). Internet telah menjadi semacam “agama baru” bagi abad ke-21 dan buat abad masa depan, yakni mengambil alih kepercayaan yang sama yang pernah diberikan pada televisyen sebaik mesinnya GE Octagon dicipta pada tahun 1928 dan di sepanjang abad 20, ketika budaya penghidupan manusiawi dibentuk dan terbentuk daripada kesan-kesan pengaruh yang terpancar melalui skrin kaca ini. Meskipun peranan televisyen kelihatan masih kuat namun kedudukannya sebagai media yang paling berpengaruh dan berkuasa, yang dipercayai oleh masyarakat manusia sebagai maha nara sumber informasi telah mengalami bukan sedikit kejatuhan nilai kepercayaan apabila Internet dengan seluruh rangkaian graviti sains-teknologi seperti Enjin Carian (Search Engine, misalnya Yahoo, Google), Browser seperti Windows Explorer, Safari, Netscape, AOL, Looksmart, Lycos, Flock, Opera, Mozilla Firefox dan lain-lain; Website, Portal, tentunya yang paling cepat mengambil alih peranan amalan media tradisi ialah E-Mail, dan Weblog serta jaringan-jaringannya seperti Chat/Messenger, Guestbook, Comments, ShoutBox/ShoutMix, yang disertakan dengan aplikasi-aplikasi organisasi atau komuniti melalui sistem Groups, Forum, contohnya Yahoo Groups, Dotmac Groups, Google Groups telah membangunkan sebuah cara menguruskan penghidupan yang serba baru dan luar biasa dengan keupayaan menjana dan menjentekkan pembentukan dan penyebaran informasi secara lebih terbuka, tertebat, dan luas tanpa mempunyai sebarang sempadan lagi.

Kuasa dan pengaruh Internet ini diperkasakan lagi dengan kebolehan-kebolehan dan kekuatan-kekuatan alternatif media daripada peranan-peranan media tradisi iaitu percetakan (akhbar, majalah, buku) dan elektronik (radio, televisyen dan filem) melalui jentera siber seperti MySpace, Friendster, Facebook, yang bersifat komuniti; Twitter, del.icio.us, Magnolia, yang bersifat jaringan persuratkhabaran; Flickr, YouTube, WebTV, iTunes, Daily Motion, Metacafe, Vimeo,

OurMedia, dan lain-lain yang bersifat penyiaran personal yang dapat menyebarkan naskhah gambar atau grafik, filem, radio dan televisyen secara berulang-ulang tanpa mempunyai halangan lagi daripada aspek waktu, tempat, sasaran termasuk ideologi dan dasar yang menjadi ciri dalam dan tanggungjawab gerakan media tradisi. Media sosial baharu ini menjadi pilihan berinteraksi dan berkomunikasi (Maynard et al. 2017: 75).

Pihak Barat sendiri mengakui melalui media sosial ini memperlihatkan keupayaan Daesh menarik umat Islam seluruh dunia menjadi ahli. Menurut Nur Azlin (2015: 26-31), kandungan media sosial Daesh terdiri:

1. Video bertajuk: *Flames Of War: The Figthing Has Just Begun* (selama 55 minit) dengan terjemahan pelbagai bahasa dunia. Ia menunjukkan keupayaan 30 ahli Daesh menawan Divisyen Ke-17 tentera Syria seramai 800 orang.
2. Video yang menunjukkan sifat romantik dan kejayaan ahli Daesh mengalahkan musuh.
3. Media sosial dengan nama *Al-Hayat Media Centre*, *Dabiq* dan *Al-Rumiyah*. Media ini agak canggih dan bersifat interaktif yang berjaya menarik minat ahli seluruh dunia.
4. Video khusus dalam bahasa Melayu untuk penonton di kawasan Asia Tenggara. Ia mengugut pihak berkuasa seperti polis dan tentera. Ia menyeru masyarakat Islam untuk menyokong dan menjadi ahli bersetuju dengan beri *bai'ah* kepada Daesh. Kementerian Dalam Negeri Malaysia (KDN telah memantau 1000 akaun facebook yang menyebarkan ideologi dan melatih ahli baru Daesh. Sejak 2013, sebanyak 100 akaun Twitter dan 50 laman web dan blog sedang dipantau oleh KDN. Seramai 177 orang di tangkap di bawah akta SOSMA (Ahmad Sauffiyan Abu Hassan 2016: 381-404).

Di Malaysia, dilaporkan beberapa kes aktiviti ekstremisme di lakukan oleh Daesh. Semuanya membabitkan pelajar dan golongan muda. Kebanyakan ahli Daesh adalah bekas pengikut Jemaah Islamiyah. Antara kes terbabit adalah;

1. Disember 2015 seorang pelajar bernama Mohd Hidayat Azman seorang pelajar IPT daripada Mesir di tangkap dan dipenjarakan selama 12 tahun. Ia di atas kesalahan memiliki senjata untuk tujuan keganasan.
2. Jun 23, 2016, suatu video yang bertajuk *Thogut*, seorang ahli Daesh berasal dari Malaysia yang dikenali sebagai Mohd Rafi memberi kenyataan yang sangat mengemparkan. Ia ditujukan khas kepada masyarakat Islam di Malaysia; *bunuh mereka di mana sahaja yang anda jumpa. Jika anda ada kereta, langgarlah mereka. Gunakan senjata dan pisan untuk tikam terus dada mereka*". Ia juga memberi amaran kepada polis Malaysia; *kepada anda yang ada di Bukit Aman, anda tidak lagi aman. Kami bersedia untuk sembelih anda. Apabila kami datang, rakan-rakan kami di negara ini juga akan memburu anda habis habisan*" (Muhammad Haziq Jani 2017: 18-19). Pada bulan yang sama, pihak PDRM telah menangkap beberapa orang yang merancang pengeboman beberapa pusat hiburan di Kuala Lumpur, ancaman bunuh beberapa pemimpin negara. Seramai 7 orang pelajar ditangkap kerana mengumpul senjata dan mengutip derma. Banyak dijumpai buku dan bendera Daesh. PDRM mengesan media sosial Daesh telah mendapat sambutan dengan beribu peminat.
3. Mac 2016 – PDRM menangkap 15 orang pengikut Daesh. Mereka terlibat mengutip derma dan menyediakan dokumen perjalanan untuk membawa pengikut Daesh ke Syria dan Filipina. Apa yang jelasnya, sempadan Malaysia selalu dicero bohi oleh pejuang Daesh daripada Filipina.
4. 28 Jun 2017 – berlaku pengeboman Kelab Malam Puchong yang mencederakan 8 orang. Ia sempena Operasi Ramadan yang hendak meraih pahala jihad yang dikesan dilakukan di banyak tempat di dunia. Operasi Puchong telah dirancang oleh Mohd Wanndy Mohd Jedi. Daesh pusat melalui Mohd Wanndy Mohd Jedi mengarahkan ahlinya membunuh pemimpin negara, polis dan hakim kerana mereka ini menghalang perkembangan Daesh. Mereka dikesan melalui soal siasat PDRM merancang untuk menyerang balai polis dan Putrajaya.

PDRM telah menangkap seramai 82 orang pada 2015 yang mahu pergi ke Syria. Pada tahun 2016 jumlah ini bertambah menjadi 116 orang. 9 orang telah berjaya lepas. Daesh berjaya mendapat

sokongan daripada Kumpulan Gagak Hitam dengan ahli 38 orang. Setakat ini seramai 110 orang Malaysia telah pergi ke Syria. Dirakamkan melalui video di YouTube, 2 orang terlibat memancung kepala musuh. 9 orang telah mati kerana menjadi pengebom berani mati.

Oleh itu, dalam isu penggunaan media sosial oleh pihak ekstremis dalam merekrut ahli dan menyebarkan propaganda mereka, perlu juga ditangani oleh pihak berwajib dengan menggunakan medium yang sama bagi mengekang penularan ancaman ekstremisme agama dalam kalangan masyarakat (Gordon et al. 2017: 1-16).

KESIMPULAN

Aliran ekstremisme agama khususnya kumpulan Daesh merupakan ancaman serius kepada soal keselamatan warga dunia secara keseluruhannya. Fahaman dan tindakan ekstrem yang disandarkan kepada Islam ini juga telah menjadi fitnah baharu kepada dunia Islam selepas gejala Islamophobia impak daripada peristiwa 9/11. Pergerakan, prasarana dan teknologi canggih telah menjadi kekuatan baru aliran ekstremisme dalam mengancam keselamatan negara dan pemikiran warga dunia. Melalui medium media sosial proses penyiapan dapat disebar dengan pantas dan meluas. Malah kini gerakannya lebih kompleks dengan wujudnya individu yang melancarkan serangan secara bersendirian melalui pendekatan *lone wolf* (serigala tunggal) dan *backpack* terroris.

Tuntasnya, ternyata sekali isu ekstremisme agama telah menjadi isu besar yang mencalarakan citra Islam sebagai agama *rahmatan lil-'alamin* di mata masyarakat dunia. Kumpulan Daesh telah mempergunakan sepenuhnya teknologi maklumat dan komunikasi moden untuk menyebarkan dakwah mereka. Mereka telah berjaya merekrutkan ahli-ahli baharu di seluruh dunia sama ada dalam kalangan lelaki atau wanita. Hal ini ternyata tersebar ke seluruh dunia, termasuklah di rantau Asia Tenggara ini dan di Malaysia khususnya. Oleh itu, kita wajib menjernihkan kembali citra Islam yang telah tercemar dan sarat dengan visi jihad yang penuh kebencian dan keganasan ini. Apa yang pastinya usaha ini lebih merupakan peperangan pemikiran dan ideologi yang menuntut kita mengkaji pola fikir golongan Daesh secara mendalam dan mengemukakan jalan penyelesaian yang terbaik bagi menanganinya. Langkah ini signifikan bagi mengembalikan suasana aman dan harmoni di peringkat lokal, serantau dan global.

PENGHARGAAN

Dapatan ini adalah sebahagian daripada hasil penyelidikan geran FRGS **FP031-2016**, “Pembinaan Model Wasatiyyah dalam Menangani Gejala Ekstremisme Agama di Malaysia” yang dianugerahkan Jabatan Pendidikan Tinggi, Kementerian Pendidikan Malaysia (KPM). Ucapan penghargaan ditujukan kepada pihak KPM di atas penganugerahan geran ini sehingga membolehkan kajian diteruskan bagi mencapai objektif yang digariskan.

RUJUKAN

- Abu Hassan Hasbullah. 2008. Kuasa Media Baru Menggempur Perubahan Bentuk dan Kandungan Ekoposial Diasia Tenggara-Satu Pembacaan Future Studies. *Jurnal Pengajian Media Malaysia* 10(1): 47-70.
- Ahmad Sauffiyon Abu Hassan. 2016. Daesh: Kebangkitan dan Pengaruh Media Sosial. *Jurnal Komunikasi* 32(2): 381-404.
- Azyumardi Azra. 2003. Bali and Southeast Asian Islam: Debunking the Myths. Dlm. *After Bali: The Threat of Terrorism in Southeast Asia*, disunting oleh Kumar Ramakrishna and Seng Seng Tan. Singapore: Institute of Defence and Strategic Studies: 52.
- Benson, B. P. 2015. The U.S. Counterterrorism Strategy: Addressing Radical Ideologies. Tesis Sarjana Naval Academy, Fort Leavenworth, Kansas.
- Bilveer Singh. 2017. The Revival of Al Qaeda's Affiliate in Southeast Asia: The Jemaah Islamiyah. *A Journal Of The International Centre For Political Violence and Terrorism Research* 9(5): 5-7.
- Bruinessen, M. V. 1992. Tarekat dan Politik: Amalan untuk Dunia atau Akherat? *Pesantren* IX(1): 3-14.

- Bubalo, A. & Fealy, G. 2005. *Joining the Caravan? The Middle East, Islamism and Indonesia*. New South Wales: The Lowy Institute for International Policy.
- Burhanudin, J. 2014. The Dutch Colonial Policy on Islam: Reading The Intellectual Journey of Snouck Hurgronje. *Al-Jami'ah: Journal of Islamic Studies* 52(1): 25-58.
- Carr, C. 2002. *The Lessons of Terror*. London. Little Brown.
- Chan, A. 2015. The Call of ISIS: The Medium and The Message Attracting Southeast Asians. *Journal of The International Centre for Political Violence and Terrorism Research* 7(4): 4-8.
- Clarence Smith, W. G. 2007. Eunuchs and Concubines in the History of Islamic Southeast Asia. *Manusya: Journal of Humanities* 14: 8-15.
- Dickson, L.W. 2015. Lone Wolf Terrorism. A Case Study: The Radicalization Process of a Continually Investigated & Islamic State Inspired Lone Wolf Terrorist. Degree project, Malmö University.
- Ferguson, K. 2016. *Countering Violent Extremism Through Media and Communication Strategies: A Review of the Evidence*. The Partnership for Conflict, Crime and Security Research, University of Cambridge.
- Gordon, T., Yair Sharan, Elizabeth Florescu. 2015. Prospects for Lone Wolf and SIMAD terrorism, *Technological Forecasting and Social Change* 95: 234-251.
- Gordon, T. J., Yair Sharan, Elizabeth Florescu. 2017. Potential measures for the pre-detection of terrorism. *Technological Forecasting and Social Change* 123: 1-16.
- Green, C. A. 2009. The Khawaarij and the Creed of Takfeer: Declaring a Muslim to be an Apostate and its Effects Upon the Modern Day Islamic Movement. Tesis Sarjana Untuk University of South Africa.
- Hasanudin Daud. 2009. Islam dan Politik: Dinamika Kerjasama Tokoh Serumpun dalam Menghadapi Penjajah. Kertas kerja dalam Dialog Membangkitkan Memori Kolektif Kesejarahan Indonesia-Malaysia. Tanjung Pinang, Indonesia. 7-9 Oktober.
- Hurgronje, S. 1985. Aceh di Mata Kolonialis. Ng Singarimbun. Terj. *The Achenese*. Jakarta: Yayasan Soko Guru.
- Iviarquardt, E. & Heffelfinger, C. t.t. *Terrorism & Political Islam: Origins, Ideologies, and Methods a Counterterrorism Textbook*. 2nd Edition. West Point, New York: United States Military Academy.
- Kamarulnizam Abdullah. 2009. The Augmentation of Radical Ideas and the Role of Islamic Educational System in Malaysia. *Studia Islamika: Indonesian Journal for Islamic Studies* 16(1): 79-106.
- Kippe, G. R. 2010. Jemaah Islamiyyah: Reevaluating The Most Dangerous Terrorist Threat in Southeast Asia. Master of Arts in Security Studies, Naval Postgraduate School.
- Knaap, G. 1994. *One Hundred and Fifty Volumes of Bidragen*, Bijdragen tot de Taal-, Land- en Volkenkunde. 150 Volumes of Bidragen: Abackward Glimpse and a Forward Glimpse. 150 (4): 637-652.
- Kruglanski, A. W. 2004. *The Psychology of Closed Mindedness*. New York: Psychology Press.
- Lukmanul Hakim Darusman. 2008. Jihad in Two Faces of Shariah: Sufism and Islamic Jurisprudence (Fiqh) and the Revival of Islamic Movements in the Malay World. Tesis PhD, The Australian National University.
- Maynard, D., Ian Roberts, Mark A. Greenwood, Dominic Rout, Kalina Bontcheva. 2017. A framework for real-time semantic social media analysis. *Web Semantics: Science, Services and Agents on the World Wide Web* 44: 75-88.
- Mirra Noor Milla. 2013. The Impact of Leader-Follower Interactions on the Radicalization of Terrorists: A Case Study of The Bali Bombers. *Asian Journal of Social Psychology* 16: 92-100.
- Mitrasing, I. S. 2011. The Age of Aceh and The Evolution of Kingship 1599-1641. Tesis Ph.D, University of Leiden.
- Mohamed Ali. 2012. The Islamic Doctrine of Al-Wala Wal Bara (Loyalty And Disavowal) In Modern Salafism. Tesis Ph.D, University of Exeter.
- Mohd Azizuddin Mohd Sani. 2016. ISIS Recruitment of Malaysian Youth: Challenge and Response, *Middle East Institute*. May 3.
- Mohd Mizan Mohammad Aslam. 2009. A Critical Study of Kumpulan Militant Malaysia, Its Wider Connections in the Region and the Implications of Radical Islam for the Stability of Southeast Asia. Tesis Ph.D, Victoria University of Wellington.

- Mohd Mizan Mohammad Aslam. 2017. The Threat of Daesh in Universities: Malaysia's Experience. *A Journal of the International Centre for Political Violence and Terrorism Research* 9(4): 13-16.
- Mohd Mizan Mohammad Aslam. 2016. MyRISS Special Report to Ministry of Higher Education Malaysia. The Threat of DAESH in Malaysian Higher Education Institutions.
- Muhammad Haniff Hassan. 2009. Jemaah Islamiyyah Ideology: An Overview. (edit Arnauld De Borchgrave) Conflict, Community and Criminality in Southeast Asia and Australia: Assessments from the Field, a Report of CSIS Transnational Threats Project, Singapore.
- Muhammad Haziq Jani. 2017. Counter Terrorist Trends and Analyses. *Journal of the International Centre for Political Violence and Terrorism Research* 9(1): 18-19.
- Muht Imran Abd Razak, Mohd Anuar Ramli & Rahimin Affandi Abdul Rahim. 2016. Aplikasi Maqasid al-Shari'ah dalam Menilai Fiqh Jihad Aliran Ekstremisme Agama. Dlm *Maqasid al-Shari'ah: Aplikasi Dalam Aspek Sosial Dan Perundangan* disunting oleh Rahimin Affandi Abdul Rahim, Mohd Anuar Ramli, Shahidra Abdul Khalil. Kuala Lumpur: Jabatan Fiqh dan Usul, Akademi Pengajian Islam, Universiti Malaya.
- Nur Azlin Mohamed Yasin. 2015. Impact of ISIS' Online Campaign in Southeast Asia. *Journal of the International Centre for Political Violence and Terrorism Research* 7(4): 26-31.
- Ramakrishna, K. 2009. Governmental Responses to Extremism in Southeast Asia: Hard Versus Soft Approaches. (edit Arnauld De Borchgrave) Conflict, Community and Criminality in Southeast Asia and Australia: Assessments from the Field, a Report of CSIS Transnational Threats Project, Singapore.
- Sugunnasil, W. 2006. Islam, Radicalism and Violence in Southern Thailand. *Critical Asian Studies* 38(1): 119-144.
- Syed Muht Khairudin Al-Junied. 2003. From Noble Muslims to Saracen Enemies: Thomas Stamford Raffles's Discourse on Islam in the Malay World. *SARI* 21: 13-29.
- Wiktorowicz, Q. 2005. A Genealogy of Radical Islam. *Studies in Conflict and Terrorism* 26: 75-97.
- Zulkarnain Haron. 2013. A Study of the Salafi Jihadist Doctrine and the Interpretation of Jihad by Al-Jamaah Al-Islamiyah. *Kemanusiaan* 20(2): 15-37.
- Zulkifli Mohd Yusoff. 2005. Gerakan Teroris dalam Masyarakat Islam: Analisis Terhadap Gerakan Jemaah Islamiyah (JI). *Jurnal Usuluddin* 21: 39-62.

Muht Imran Abd Razak
Lecturer,
Academy of Contemporary Islamic Studies (ACIS),
Universiti Teknologi MARA, Perak Branch,
Seri Iskandar Campus,
Perak Darul Ridzuan.
Email: imranrazak@perak.uitm.edu.my

Rahimin Affandi Abdul Rahim, (PhD)
Associate Professor,
Department of Fiqh dan Usul,
Academy of Islamic Studies
Universiti Malaya
Email: faqir_ila_rabbih@um.edu.my

Mohd Anuar Ramli, (PhD)
Senior Lecturer,
Department of Fiqh dan Usul,
Academy of Islamic Studies
Universiti Malaya
Email: mohdanuar@um.edu.my

Siti Maimunah Hj. Kahal
Research Assistant,
Academy of Islamic Studies
Universiti Malaya
Email: mykahal89@yahoo.com

Rabiatul Adawiyah Mohamed Ratha.
Master Student,
Academy of Islamic Studies
Universiti Malaya
Email: abidratha@gmail.com

Received : 2 November 2017
Accepted : 27 February 2018